



**Datë:** 16.07.2025

**Numër Protokoli:** 4815/2025

**A.nr.886/2025**

**Këshilli i Pavarur Mbikëqyrës për Shërbimin Civil të Kosovës**–Kolegji për Shqyrtimin dhe Vendosjen e Ankesave, në përbërje nga: Arben Mehmeti-kryetar, Ardita Haxhnikaj Demi dhe Malsore Gashi Bajraktari -anëtarë, me Flakron Gashi, në cilësinë e procesmbajtësit, në procedurën sipas ankesës me numër A.nr.886/2025, të datës 14.05.2025, të parashtruar nga ankuesi H.A, kundër organit të punësimit/Komunës së Kamenicës, në çështjen juridike “*kërkesë nga marrëdhënia e punës*”, duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180, si dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 16.07.2025, mori këtë:

## V E N D I M

**Hedhet poshtë si e palejuar** ankesa A.nr.886/2025, e datës 14.05.2025, e parashtruar nga ankuesi H.A.

## A r s y e t i m

Nëpunësi Civil, H.A (*në tekstin e mëtejme referuar: Ankuesi*), me datë 14.05.2025, ka parashtruar ankesë në Këshillin e Pavarur Mbikëqyrës për Shërbimin Civil të Kosovës e cila është regjistruar nën shenjën A.nr.886/2025 dhe numër protokoli:3160, kundër procedurës heshtjes administrative të organit të punësimit në kërkesën tij të datës 24.03.2025.

Këshilli i Pavarur Mbikëqyrës për Shërbimin Civil të Kosovës (*në tekstin e mëtejme referuar: Këshilli*) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datën 20.05.2025 ka proceduar kërkesën për përgjigje në ankesë tek Komuna e Kamenicës, ndërsa kjo e fundit, me datë 23.05.2025, ka përcjellë përgjigjen në ankesë së bashku me shkresat e lëndës.

Kryetari i Këshillit ka nxjerrë Vendimin me shifër VK/2025 dhe numër protokoli:4373/2025, përmes të cilit ankesës së ankuesit nën shenjën A.nr.886/2025 të datës 14.05.2025 ia ka vazhduara fatin e vendimmarrjes edhe për dhjetë (10) ditë të tjera, ditë pune.

**Kolegji për Shqyrtimin dhe Vendosjen e Ankesave (në tekstin e mëtejme referuar: Kolegji i Këshillit) për vendosje meritore administroi këto prova:** Ankesën me numër protokoli 3160/2025 e parashtruar nga ankuesi më datën 14.05.2025 në Këshillin e Pavarur Mbikëqyrës për Shërbimin Civil të Kosovës; Vendimin e Këshillit VK/2025 të datës 25.05.2025; Kërkesën e ankuesit të datës 26.03.2025 me numër:7127; Kopjen e letërnjoftimit të ankuesit; Vendimin e Qeverisë së Republikës së Kosovës të datës

23.10.2024; E-mailin e datës 14.05.2025 dërguar nga ankuesi në Këshill; Kërkesë për përgjigje në ankesë e datës 20.05.2025; Përgjigje në kërkesë e datës 23.05.20285; Akt Emërimit e ankuesit, Vendimin me shifër VK/2025 dhe numër protokolli:4373/2025.

Kolegji i Këshillit, pas shqyrtimit të gjitha shkresave të lëndës të parashtruara nga palët në procedurë, ka konstatuar se ankesa e ankuesit, **është e palejuar, sepse:**

Kolegji i Këshillit, nga administrimi i shkresave të lëndës të parashtruar nga pala në procedurë ka konstatuar se ankuesi H.A sipas Aktit të Emërimit të datës 01.01.2011 mban pozitën punës “Zyrtar i Gjendjes Civile”, Drejtoria për Administratë, në Komunën e Kamenicës.

Kolegji i Këshillit, po ashtu ka konstatuar se ankuesi me datë 26.03.2025 ka parashtruar kërkesën e cila është protokolluar me numër:7127 pranë Njësisë së Burimeve Njerëzore të Komunës së Kamenicës, me qëllim të klasifikimit të vendeve të punës që ndërlidhet me pozitën e tij duke iu referuar Vendimit të datës 23.10.2024 të Qeverisë së Republikës së Kosovës për aprovimin e katalogut të vendeve të punës në shërbimin civil, ndërsa organi i punësimit ka heshtur në kërkesën e tij të datës 26.03.2025, ashtu që i njëjti kundër heshtjes administrative përmes e-mailit me datë 14.05.2025 ka parashtruar ankesë në Këshill.

Kolegji i Këshillit lidhur me pranueshmërinë e ankesës së ankueses , ka analizuar dispozitat ligjore të Ligjit Nr.05/L-031 për Procedurën e Përgjithshme Administrative, gjegjësisht nenin 98 paragrafin 1 dhe 2, ku përcaktohet se: *1. Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure. 2. Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj*”, si dhe nenin 127 paragrafi 1 dhe 4 i të njëjtët ligj ku përcaktohet se: *“1. Ankesa duhet të parashtrohet brenda tridhjetë (30) ditëve nga data kur pala është njoftuar për aktin administrativ. 4. Ankesa kundrejt heshtjes administrative mund të parashtrohet jo më herët se shtatë (7) ditë dhe jo më vonë se dy (2) muaj pas skadimit të afatit për njoftimin e aktit administrativ.*

Ndërlidhur me këtë, Kolegji i Këshillit në bazë të shkresave të lëndës si dhe konstatimeve të dhëna si më lartë në arsyetimin e këtij vendimi, konstaton se ankesa e ankuesit e datës 14.05.2025 e parashtruar në Këshillin e Pavarur Mbikëqyrës për Shërbimin Civil të Kosovës është e paraafatshme, ngase e njëjta është parashtruar në kundërshtim me nenin 127 paragrafi 4 të Ligjit Nr.05/L-031 për Procedurën e Përgjithshme Administrative, pasi që institucioni punëdhënës lidhur me kërkesën e ankuesit të datës 26.03.2025 ende nuk kishte vendosur apo nuk ka nxjerrë akt administrativ përpara se ankuesi të parashtrojë ankesë në Këshill, sikurse që nuk është përmbushur as kriteri kohor ndërlidhur me heshtjen administrative, pasi që institucioni punëdhënës sipas dispozitave të lartcekura ligjore ka pasur afat kohor katërdhjetë e pesë (45) ditë, për trajtimin e kërkesës së ankuesit të datës 26.03.2025, ndërsa ankuesi ankesën në Këshill e ka parashtruar me datë 14.05.2025 apo në ditën e pesëdhjetë (50) pas parashtrimit të ankesës në institucion punëdhënës, nga rrjedh se ankuesi nuk e ka respektuar apo prit përmbushjen parakushtin ligjor të afatit kohor **“jo më herët se shtatë (7) pas skadimit të afatit për njoftimin e aktit administrativ”**, nga rrjedh se ankuesi përveç kalimit të katërdhjetë e pesë (45) ditëshit, është dashur të pres edhe shtatë (7) ditë të tjera, për të hyrë në heshtje e administrative sipas përkufizimeve ligjore të dispozitave të LPPA-së.

Andaj, Kolegji për Shqyrtimi dhe Vendosjen e Ankesave, nga të gjeturat e dhëna si më lartë, konstaton se ankesa e ankuesit e parashtruar në Këshillin e Pavarur Mbikëqyrës për Shërbimin Civil të Kosovës me datë 14.05.2025 është parashtruar në kundërshtim me nenin 127 paragrafi 4 të Ligjit Nr.05/L-031 për Procedurën e Përgjithshme Administrative, andaj është hedhur poshtë si e palejuar si në dispozitiv të këtij vendimi pasi që nuk e plotëson kushtin e nevojshëm të pranueshmërisë së ankesës në kuptim të nenit 129

paragrafi 1 nën paragrafi 1.3 të Nr.05/L-031 për Procedurën e Përgjithshme Administrative ku përcaktohet se: *“Ankesa është e pranueshme nëse i plotëson këto kushte: 1.3. ajo është parashtruar brenda afatit të parashikuar nga neni 127 i këtij ligji.”*

Andaj, pas analizimit dhe vlerësimit të të gjitha shkresave të lëndës si dhe duke u bazuar në nenin 6 paragrafin 1, nën paragrafin 1.1 dhe nenin 18 paragrafi 1 nën paragrafi 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180, Kolegji i Këshillit vendosi si në dispozitiv të këtij Vendimi.

Vendim hyn në fuqi në ditën e nënshkrimit nga Kryetari i Kolegjit.

**Këshillë juridike:** Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij Vendimi.

**KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS**  
**Lënda, A.nr.886/2025, datë 16/07/2025.**

**Flakron GASHI**

\_\_\_\_\_  
**Procesmbajtës**

**Arben MEHMETI**

\_\_\_\_\_  
**Kryetar i Kolegjit**

**Vendimi i dorëzohet:**

- Ankuesit H.A;
- Komunës së Kamenicës (Udhëheqësit të Burimeve Njerëzore), si dhe;
- Arkivit të KPMSHCK-së.